

Na osnovu člana 47. stav 6. Zakona o veterinarstvu u Bosni i Hercegovini ("Službeni glasnik BiH", broj 34/02), federalni ministar poljoprivrede, vodoprivrede i šumarstva donosi

PRAVILNIK
O POSTUPKU ISPLATE NADOKNADE ŠTETE ZA
NEŠKODLJIVO UKLONJENE SEROPOZITIVNE
ŽIVOTINJE

Član 1.

Ovim Pravilnikom se utvrđuje postupak isplate nadoknade štete za neškodljivo uklonjene seropozitivne životinje, nastale prilikom provođenja propisanih mjera suzbijanja i iskorjenjivanja zaraznih bolesti životinja.

Član 2.

Vlasnik životinje koja je neškodljivo uklonjena u postupku provođenja mjera za suzbijanje i iskorjenjivanje zaraznih bolesti od posebnog interesa za Federaciju Bosne i Hercegovine (u daljnjem tekstu: Federacija) i zoonoza, ima pravo na nadoknadu ako je:

- a) bez odgađanja prijavio sumnju na zaraznu bolest životinje najbližoj veterinarskoj organizaciji;
- b) obavio propisano obavezno preventivno vakcinisanje u određenim vremenskim periodima, kao i dijagnostičko i drugo ispitivanje životinja.

Član 3.

Vlasniku seropozitivnih životinja neće se isplatiti nadoknada ukoliko:

- a) se bolest pojavila tokom uvođenja novih životinja u stado, koje nemaju propisane potvrde o zdravstvenom stanju;
- b) se bolest pojavila tokom propisanih ispitivanja u međunarodnoj trgovini (karantin);
- c) životinje nisu obilježene propisanom ušnom markicom;
- d) zahtjev za nadoknadu nije podnesen Federalnom ministarstvu poljoprivrede, vodoprivrede i šumarstva (u daljnjem tekstu: Federalno ministarstvo) u roku od dvadeset i jedan dan, od dana neškodljivog uklanjanja životinja.

Član 4.

Nadoknada za neškodljivo uklonjene životinje, sirovine, odnosno predmete određuje se prema tržišnoj vrijednosti na dan neškodljivog uklanjanja.

Za prinudno zaklane životinje ili djelimično oštećene predmete, odnosno sirovine u cijelosti ili djelimično još upotrebljive, nadoknada će biti umanjena za vrijednost još upotrebljivog dijela.

Član 5.

Procjenu vrijednosti životinje i predmeta utvrđuje komisija koju imenuje kantonalno ministarstvo nadležno za poslove veterinarstva (u daljnjem tekstu: kantonalno ministarstvo), u čijem sastavu mora obavezno biti doktor veterinarske medicine.

Član 6.

Postupak za isplatu nadoknade pokreće se na zahtjev vlasnika. Zahtjev se podnosi kantonalnom ministarstvu u roku od sedam dana od dana izvršenja neškodljivog uklanjanja životinje. Zahtjev se podnosi na obrascu koji se nalazi u prilogu ovog Pravilnika i čini njegov sastavni dio (prilog 1.).

Član 7.

Vlasnik popunjava obrazac zahtjeva uz koji prilaže slijedeću dokumentaciju:

1. Potvrđan laboratorijski nalaz koji je dobiven RVK metodom;
2. Rješenje nadležnog veterinarskog inspektora kojim se naređuje sprovođenje mjera;
3. Zapisnik komisije o neškodljivom uklanjanju;
4. Zapisnik komisije o procjeni štete;
5. Rješenje kantonalnog ministarstva o pravu na nadoknadu štete.

Član 8.

Nakon provedenog postupka za utvrđivanje prava na nadoknadu štete, 50% sredstva osigurava i isplaćuje kantonalno ministarstvo.

Na osnovu rješenja kantonalnog ministarstva o pravu vlasnika na nadoknadu, Federalno ministarstvo isplaćuje vlasniku preostalih 50% od procijenjene vrijednosti životinje.

Član 9.

Kantonalno ministarstvo je dužno odobrene zahtjeve dostaviti Federalnom ministarstvu na isplatu nadoknade u skladu sa članom 8. stav 2. ovog Pravilnika najkasnije u roku od petnaest dana od dana prijema zahtjeva vlasnika neškodljivo uklonjene životinje.

Član 10.

Troškove eutanazije životinje i dezinfekcije dvorišta, obora i staja snosi vlasnik životinje.

Član 11.

Ovaj Pravilnik stupa na snagu narednog dana od dana objave u "Službenim novinama Federacije BiH".

Broj 01-02-108-1/08
23. aprila 2008. godine
Sarajevo

Ministar
mr. sci. **Damir Ljubić**, s. r.

Prilog 1.

(Ime i prezime vlasnika, JMBG)

(adresa)

(telefon)

Kantonalni organ uprave nadležan
za poslove poljoprivrede, vodoprivrede i šumarstva

PREDMET: Zahtjev za naknadu štete

(podnositelj zahtjeva)

U prilogu dostavljam:

1. Transakcijski račun banke _____
(šesnaestoznamenkasti broj)
2. Broj računa (partije) _____
3. Potvrđan laboratorijski nalaz koji je dobiven RVK metodom;
4. Rješenje nadležnog veterinarskog inspektora kojim se naređuje
provođenje mjera;
5. Zapisnik povjerenstva o neškodljivom uklanjanju;
6. Zapisnik povjerenstva o procjeni štete;
7. Rješenje kantonalnog organa uprave nadležnog
za poslove poljoprivrede, vodoprivrede i šumarstva;

(mjesto i datum)